

Caya Alphonso "Buchi" Boekhoudt y Caya Harie Theodomiro Bareño

Dos caya a haya number di Arubianonan ehemplar




ORANJESTAD (AAN): Di aranson atardi na altura di rotonde di Piedra Plat, Prome Minister Evelyn Wever-Croes a duna un discurso na ocasion di desvelo di Caya Alphonso "Buchi" Boekhoudt y Caya Harie Theodomiro Bareño. Gobierno di Aruba bou vision di Minister di Infrastructura Otmar Oduber a reconoce e grandesa di e dos ciudadanonan aki dunando cayanan den nan bario nan number. Premier Wever-Croes a bisa lo siguiente:

"Sr. Buchi Boekhoudt y Sr. Harie Bareño ta representa kico hopi entrepreneur ta cuminsa cu ne. Nan a wak un necesidad den nan comunidad pa progreso y desaroyo. Ambos tabata pionero. Nan spirito emprendedor y innovador a pone cu awe nan ta haya reconocimiento. Ambos kier a haci cosnan na forma nobo y miho. Y tabata exitoso den esey.

Nan kier a trece solucion den forma hopi simpel pero efectivo cu participacion di comunidad. Nan tabata hopi orienta riba envolvimento di nan comunidad. E simpleza di nan solucionnan, musica y panaderia, tabata innovativo pasobra a combina e elemento di necesidad y idea nobo y innovativo. Esaki a haci'e facil pa esnan den nan alrededor compronde. Door di e simpleza y efectividad, comunidad a tuma e timon den yuda desaroya e vision di e pioneronan aki. Den ambos caso, di Sr. Boekhoudt y sr. Bareño e ser humano tabata central.

Entrepreneurs di naturalesa tin un amor pa nan alrededor y door cu e kier wak progreso y oportunidad nobo, e ta bin cu un solucion pa un problema existente.



Door di focus riba e necesidad y envolvimento di nan comunidad y combina esey cu nan vision, sr. Bareño y sr. Boekhoudt a logra nan meta. Nan a efectivamente combina pensamiento innovativo, envolvimento di nan comunidad (social innovation) y cu yen curashi a crea algo nobo y diferente. E synergia di diferente elemento a haci cu nan intento tabata exitoso y cu te dia di awe Aruba ta gosa di nan aporte. Esaki ta un ehempel di innovacion.

Ni maski con e nos mun-

do ta cambiando, nos nunca mester lubida nos raiz, nos fundeshi, esaki ta local ta nos fondo di inspiracion, creatividad, y nos spirito di innovacion. Nos no tin cu wak mucho lew, ehempelnan asina ta mas cerca di nos cu nos ta kere. Sr. Harie Bareño y sr. Buchi Boekhoudt a regala nos un storia bunita cu semper lo keda parti di nos historia di e Arubiano su e spirito emprendedor, pa asina keda inspira generacion tras di generacion'.

